

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 20/3

22 օգոստոսի 2016թ.

Քննարկվեց քաղաքացի Անդրուշ Սարգսյանի գանգատը ՀՀ ԿԱ ՊԵԿ աշխատակազմի իրավաբանական վարչության պետի 07.06.2016թ. թիվ 643/03-16 որոշման դեմ:

Անդրուշ Սարգսյանի գանգատում բերված փաստարկները.

Անդրուշ Սարգսյանը հայտնում է, որ 03.08.2015թ. Ռուսաստանի Դաշնությունում գնել է 3000 հատ հնդուհավի ինկուբացիոն ձու և իր ավտոմեքենայով տեղափոխել Հայաստան: Լարսի անցակետում բոլոր փաստաթղթերը ձևակերպելուց հետո սահմանապահները պարտադրել են անցկացնել տեղափոխվող բեռի ռենտգեն զննում, ինչը և կատարվել է: Այդ ընթացքում մաքսատան աշխատակցի և սահմանապահի միջև տեղի է ունեցել վիճաբանություն: Այնուհետև մեքենան բաց են թողել, սակայն իրականացված ռենտգեն զննության վերաբերյալ որևէ փաստաթուղթ չեն ներկայացրել: Ինկուբացիա իրականացնելուց հետո 3000 հատ ձվից ստացվել է ընդամենը 200 հատ անվորակ ճուտ, որոնք երեք օրից սատկել են: Հետագայում Անդրուշ Սարգսյանը պարզել է, որ ինկուբացիոն ձուն ռենտգեն զննության չի կարելի ենթարկել:

Նույնբեր ամսին՝ ներմուծումից մոտ ութ ամիս հետո, զանգահարել են Անդրուշ Սարգսյանին և խնդրել են ներկայանալ հարկային տեսչություն: Այցելությունից հետո պարզվել է, որ իր նկատմամբ հաշվարկվել է 1.483.978 դրամի պարտավորություն:

Ելնելով վերոգրյալից՝ Անդրուշ Սարգսյանը խնդրում է իրեն ազատել հաշվարկված տույժերից և տուգանքներից, ինչպես նաև պարգաբանել, թե ինչու համար ավելացված արժեքի հարկը պետք է վճարի կրկնակի անգամ:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննարկելով Անդրուշ Սարգսյանի վերաբերյալ վարչական վարույթի նյութերը պարզել է, որ համաձայն հարկային մարմնում առկա անձնական հաշվի քարտի տվյալների ֆիզ. անձ Անդրուշ Սարգսյանի (ՀՎՀՀ՝ 27935232, հասցե՝ ք. Երևան, Շահումյան 4 փ. 41տ.) 04.05.2016թ. դրությամբ ԵՏՄ անդամ պետություններից իրականացված ներմուծումների արդյունքում չկատարած ԱԱՀ-ի գծով հարկային պարտավորությունները կազմում են 1.483.978 դրամ:

Համաձայն «Վարչարարության հիմունքների և վարչական վարույթի մասին» ՀՀ օրենքի 30-րդ հոդվածի 1-ին մասի հարուցվել է վարչական վարույթ՝ ֆիզ. անձ Անդրուշ Սարգսյանի չկատարած հարկային պարտավորությունները գանձելու վերաբերյալ «Հարկերի մասին» ՀՀ օրենքի 29.1 հոդվածով նախատեսված վարչական

ակտ ընդունելու նպատակով, որի մասին 27.05.2016թ. վերջինս պատշաճ կերպով ծանուցվել է, սակայն վարույթի նյութերին ծանոթանալու համար չի ներկայացել և որևէ բացատրություն չի տվել:

Անդրուշ Սարգսյանի կողմից ԵՏՄ անդամ պետություններից իրականացված ներմուծումների արդյունքում չկատարած ԱԱՀ-ի գծով հարկային պարտավորությունները կազմել են 1.483.978 դրամ, որից ապառք՝ 588.880 դրամ, տույժ՝ 335.662 դրամ, տուգանք՝ 559.436 դրամ: Նշված պարտավորությունն առաջացել է 2015թ. մարտ ամսին իրականացված ներմուծումից, որը ենթակա է գանձման:

Վերոգրյալի հիման վրա և ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ԿԱ ՊԵԿ իրավաբանական վարչության պետի կողմից 07.06.2016թ. ընդունվել է թիվ 643/03-16 որոշումը (այսուհետ նաև՝ Գանձման որոշում) Անդրուշ Սարգսյանից 1.483.978 դրամ պարտավորության գումար գանձելու մասին:

Քննարկվող դեպքում Գանձման որոշմամբ առաջադրված պարտավորությունն առաջացել է Անդրուշ Սարգսյանի կողմից իրականացված ներմուծումից: Մասնավորապես, 2015թ. մարտ ամսին Ռուսաստանի Դաշնությունից ներմուծվել է 3000 հատ հնդուհավի ինկուբացիոն ձու:

ՀՀ կառավարության 30 հուլիսի 2015 թվականի N 865-Ն որոշմամբ (այսուհետ՝ Որոշում) սահմանված են Հայաստանի Հանրապետությունում օրենքով սահմանված կարգով անհատ ձեռնարկատեր չհանդիսացող ֆիզիկական անձանց կողմից Հայաստանի Հանրապետություն ներմուծվող ապրանքների ակնհայտ առևտրային չափաքանակները՝ համաձայն N 1 հավելվածի:

Որոշմամբ սահմանված N 1 հավելվածի համաձայն ԱՏԳ ԱԱ թիվ 0407 ծածկագրին դասվող «Թռչնի ձու կեղևով, թարմ, պահածոյացված կամ եփած» ապրանքների համար 150 հատը գերազանցող մասը համարվում է ապրանքների ակնհայտ առևտրային քանակություն:

Իր հերթին, Որոշման 3-րդ կետի համաձայն՝ սույն որոշման N 1 հավելվածով սահմանված ապրանքների չափաքանակները գերազանցող քանակով Եվրասիական տնտեսական միության անդամ հանդիսացող պետություններից Հայաստանի Հանրապետության տարածք ներմուծվող ապրանքների հարկման բազան որոշվում է «Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքին համապատասխան:

«Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքի 7-րդ հոդվածի 2-րդ մասի համաձայն՝ ներմուծվող ապրանքների համար հաշվարկված ԱԱՀ-ի և ակցիզային հարկի գումարները ՀՀ պետական բյուջե են վճարվում մինչև ապրանքները Հայաստանի Հանրապետության տարածք փաստացի ներմուծելու (Հայաստանի Հանրապետության պետական սահմանը հատելու) օրը ընդգրկող ամսվան հաջորդող ամսվա 20-ը ներառյալ՝ որպես հարկային մարմնին վճարվող գումարներ:

Քննարկվող դեպքում, համաձայն ներմուծման ժամանակ լրացված «Տարանցիկ հայտարարագրի» Անդրուշ Սարգսյանի կողմից ներմուծվել է ԱՏԳ ԱԱ թիվ 0407

ծածկագրին դասվող ապրանք (ապրանքի ծածկագիրը 0407191100)՝ թվով 3000 հատ, որը Որոշմամբ սահմանված N 1 հավելվածի համաձայն համարվում է ապրանքների ակնհայտ առևտրային քանակություն:

Հարկ է նշել նաև, որ Անդրուշ Սարգսյանը 04.02.2016թ-ին Մաշտոցի ՀՏ է ներկայացրել «Ներմուծման հարկային հայտարարագիր», որում արտացոլել է վերոգրյալ ներմուծումից առաջացած ԱԱՀ-ն՝ գումարով 588.880 դրամ:

Ելնելով վերոգրյալ փաստական հանգամանքներից՝ Հանձնաժողովը գտնում է, որ Գանձման որոշմամբ առաջադրված պարտավորությունները հիմնավոր են, հաշվարկվել են ՀՀ օրենսդրությամբ սահմանված կարգով և ենթակա են վճարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

ՀՀ ԿԱ ՊԵԿ աշխատակազմի իրավաբանական վարչության պետի 07.06.2016թ. թիվ 643/03-16 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ